

四庫全書

集部

欽定四庫全書

東維子集卷四

元 楊維禎 撰

序

送張從德之湘鄉州判序

保定張君從德自其先僑居吳中有年矣君以門廕初倅溧陽再轉諸暨皆以憂不赴制閱倅湘鄉其行也吳士大夫悉知其世德與其為人先大夫省齋公博極經

史勵志力行官登三品秩名實布于中外君蚤學不勸
晚志操愈高為克紹所基者故皆樂為歌詩以箴之而
屬余有以序諸顛予聞而喜之曰自昔寓公子弟之居
吳者類以馳馬走狗擊鞠博戲為事否則甘色嗜聲淫
寄歟而亡其歸先人之業蕩然矣豈復有以學為事志
操為先者及其廕仕也鮮克其任而斬其世澤者有矣
吾嘗親視張君在貧賤而有休色於富貴則不無憾然
者非有學能爾乎夫行潔則可以聞道志一則可以立

功道聞而功立豈直倅一州而可哉湘鄉古熊湘之屬
邑也地有三江五湖之壯且險其民往往湍悍難治而
其士也則清而文為可善也國初以其戶齒之繁而陞
州君倅於彼以吾所謂聞道立功者理之吾未見湍悍
之難治而且見清文之易為化也況省齋公平日治道
之講者君聞之稔矣豈得悖吾言哉於君之行遂書為
叙而吳人士之詩係於后云至正七年秋八月十有八
日

送錢伯舉衢州錄類序

國家懲前朝守令顯城之弊止設監長次及副貳並出制命又非異時私辟使有主客勢嘻顯弊去矣不知窮州下邑民日貧戶日耗聚羣行吏持之又弗免十羊九牧之撓唯郊關之內廛處之民領之者曰錄司司設官僅三兩官弗冗事亦釐錄判者雖秩卑負末職下旁于遊徼而一司之政得彼此持可不議短長錄監守行弗率類所守貞所出直而達遂為民儀嚮類覆上監守嘻

官豈可以崇卑正副計哉吳中錢君伯舉以故家台州
通守之津屢試仕筦庫民休戚情悉矣吏成敗事諗矣
今登秩為衢州錄類官伯舉年益增學益優又以其熟
民情吏事者佐理于錄吾見衢之民慶其來之莫矣况
衢之君子類好文墨而敏於義事市人出郭而嫉登前
山臨背水飄飄然有神仙之思其習嚚奸者寡矣第未
知監與守與伯舉同志乎不也果同焉吾將慶伯舉之
佐理益易易也豈曰錄類顓職游徼而止哉伯舉勉之

以徵吾言可也至正七年秋九月初吉

送王茂實慈利州同知序

譚州縣職者以同知比縣之丞上監守長焉下通倖季
焉同知者得便文自營其中故勢權劣訾詬輕黜胥奸
民率制之者寡矣其人之伋厯檢者往往樂居之嘻此
豈國家肇建守佐之意哉守令之選其清也久矣同知
其事者苟能以吾民為念一貞其身而左右前後靡不
正未有不行乎顧行而推利下人者也發政施令覆出

監守上固不得以地為限矣昆陽王公茂實簽省齋公之孫也初承世澤為下砂令考滿轉同知慈利州所與遊者咸為之慶以其驟加秩三等為優又不居守將責望之地而在其貳焉可以便文自營矣豈不優甚哉余嘗交茂實吳中知其志甚遠每每悼民窮疾官敗則知茂實之材將有為於時而伉其官不以同知為追責地喜也吾所論同知發政施令覆出監守上者將於茂實焉徵之抑吾聞慈利乃赤松隱遁之鄉其山多隱君子

以詞章出仕者有騷人之遺風焉故為慈利者甚易易
吾見茂實之得治民蚤而其退之暇又得山水之樂於
騷人羽客之儔也是則茂實之優者已於其行也予既
與客崇酒以別之酒餘賦詩者若干首而遂以余言為
叙引云至正七年秋九月序

送蘆漚巡檢范生序

友生白子昭為余言樂城范生廉卿之為人樂風堅忍
隱厚其人廉節而好禮貞信而少文廉卿本其風之微

而習經術於南中儒先生術成無所於試乃俯就門廕
官巡檢蘆漑廉卿雅士巡檢引弓民長也以雅士長引
弓職大鑒若才今佩武器擁邏士領職其所與游者則
既為慷慨歌詩相與張飲西津重徽一言以序其去余
既聞廉卿雅士而樂之及聞職蘆漑則不寧鑒才之懼
蘆漑鹽榷之司在焉鹽萌依私榷為命雖流死比交跡
不以屬心在令處榷官一失其覺分其罪罪官不幸再
三失小輟祿大貶爵而其失或遠出所邏外波聯蔓牽

莫之雪白漕府猜禍吏聚積如牛腰明漕長不曲直即有曲直吏輒以律雌黃其明嗟乎權之逮不辜法端使然哉故余於庶卿之巡檢蘆漕不寧盤才之懼也雖然國家於鹺病之劇方議更而新之求天下之善言鹽策者是諏是採廉卿試以其得於所學者為採風者言之使法不逮不辜余之懼也庶幾其或免矣夫

送郭公知事還湖州序

杭江以南望郡也在宋為行都今為行垣所郡治領州

一縣八錄事司四其俗具五氏而不一其民習踳爭巧
媮而不和厚故奸伏易秉獄市滋起吏重應上取下什
百于他郡非長以能材佐以良幹之屬捷應辦工發摘
者不能得治名廼者總筦某去經歷某又去兩知事坐
不任廢府事麻沸狼籍無與理者惟今湖州知事河中
郭公仲敏以佐治令聞徹省府相君簡識其人而傷杭
治之難無與承乏者乃特移職於茲知事位在經歷下
其識贊三尺平以左右二千石者也公至則既鞅鞅屬

曹而裁決予奪實又兼二千石之職時未期月而府事
債者起滯者疏破者補又牙齟齬者無不受帖順易相
府而下察憲漕所疾呼急諾又罔不周旋如意於是攝
職稱治民歡然誦之為良幹官今復政而去也杭官吏
相與張飲西亭以餞而乞餞言於維禎維禎念民無賴
於吏久矣以吏苟於公而急於私而已矣有能移其私
於友與親者鮮矣矧能移其私於官乎能物其官於本
位者鮮矣矧又能物其官於他之位乎故維禎開杭吏

無治狀至於廢而去未嘗不悲其才之窮及聞杭人譚郭公之政又未嘗不嘆其才微而無私之治足以及人之廣如此也

李經歷

經歷古郡功曹之官功曹太守所自辟也經歷今出吏部選用七品印章奏三尺平控吏牘進退上以齊二千石長吏之異同而下以內群書佐於成軌此其體益隆而責亦重矣朝廷慎其選與守令同以廉明者有操尚

者居之故郡不得良二千石幸而得一良經歷郡可治
徽州路經歷李君其代滿歸廬陵其從子出其郡人士
所書治績求余文叙以送之予惟李君之政班班可書
徽州人士侈紀載者皆能之抑今之稱良經歷者蓋未有
君之職其職也君之簡詒詞革濫卒吏未足稱良于經
歷也平質劑于市明爰書于獄畫委輸之法而州縣之
官便安之未足稱良于經歷也惟其政有勿正于上必
務引其人去弗正以就正如曲木之就繩悍馬之就馭

吁此真良經歷矣余聞徽之非金也歲監官取其羨為
己有君還羨於民以准他歲非之數徽之祿廩也田不
足而取諸山山不毛則白取諸佃君收實入而蠲白取
為久久定則鄉之宿豪餌官府為奸也抑之不得行土
胥相為根柢持短長於官也格之無所置手足所謂上
之異同有所齊而下之成軌有所內經歷至此信可以
稱良也余閱郡經歷凡若干人往往陷於隨而不立未
見職職如李君者其能已於言乎故為約其政件言之

且視人以吏師非徒紀載也

送海鹽知州賈公秩滿序

天下公論不在公府而恒在閭巷之民若甚愚而是非之心則甚白也邦大夫之政其失者議於市謗於道而其善者亦嘖嘖不容口故欲稽守令善惡不察守令而察閭巷之言得之矣余過海鹽田間往往逢伯格長頌其州太守之治問守為誰則宛邱賈公禧也余已心賢之未幾州人士張玉集其餞行歌詩凡若干首來請曰

自海鹽升州置守其得民譽未有若今賈公之最者也
曩時廉吏郡形迹仇視吾大姓家訟多不獲其平公廉
無嫌是避即理直大姓必舉即不直雖貧弱誅不少借
故獄者積歲不決者部使者多以屬公而得其平亭吏
罷軟者撓寮佐庸闇者蔽吏胥雖令出無私有不能以
直遂者公一施令群佐虔若卑弟生之聽嚴傳老胥順
流其風旨又肅然若家老之奉其尊行之以正限之以
信故令有司可於上而惠無不逮於下也先是吏卒巡

田里如蟻不絕公至立削跡上府聞之因檢戒左右無
奸州以其非令者又州民與亭族交其習蠡焉易生
事公申以條教悉改心歸化無異時剽輕之風此其得
譽於民而布之州府士之詠歌實有徵焉幸子一言叙
詩首余以其言與其伯格長之頌合又以今之為守令
者往往課米鹽奉期會不復知有伸民情消民隱懇懇
然以厚民成俗為事者遂樂為之叙以風告他吏云

送監郡觀閣公秩滿序

劉子曰忠孝不修他善無取吁臣子之職無他忠與孝而已耳韓非子曰親之孝子君之背臣吁忠孝固不能兩美也今有人焉於子不為悖而於臣不為背也豈非臣子之全美乎吾於錢唐守將見之者閭公是已公下車以來先問民利害休戚而務去其害與戚者郡有猜禍吏與夫強宗世家不仁於人必痛鉏治之猶之牧羊去其害群而群始蕃猶之理疾剷殺其病本而病始平民之怙法者必刑誣誤者必思出之即不出如梗在咽

必吐乃已此公理法也紅巾賊陷杭凡杆城守土之臣不微遁即賣降爾公獨佐監憲某官監兵某官與賊持者十有三日阽危于矢石數四城池破毀而復完者公之雄謀大節作於人者矣時則高堂太夫人屏居密所公猶衷戎衣朝夕覲如平時不貽其親有一日憂故出不稱背臣入不稱悖子吁若公之忠之孝吾所謂臣子之美非歟今代而去郡之民如去其父僚吏如去其師去之日民父老若干人走予次舍謁文志去思又持其

謠送之卷請序以為郭西門供帳予親見公之忠孝治
狀有為世道勸者於是乎書至正十四年六月三日

送旌德縣監亦憐真公秩滿序

國朝監官郡邑達魯噶齊於官屬為最長其次有令
有丞有簿尉又有案牘官以首領夫六曹之吏凡事會
之來吏與令丞得相可否議論然後白之達魯赤其署
事也亦然其職秩為甚尊而職任為甚優朝家近令以
六事責守令達魯噶齊任與令等昔之尊而優者今轉煩

劇矣宣之旌德縣亦憐真公始由省署而典符印累監
望縣三調至於今職且四載宣上德以及民而使民無
愁嘆之聲山林草澤咸知向化大府藉之以集事同寅
恃之以取則民有所賴而不恐吏有所憚而不肆六事
之備固無可議而於學校尤加之意焉延師儒廣生徒
月書季考凡邑之士咸囿於教養樂育中弦誦之聲
相聞是又知所本矣往年淮寇渡江列城殘毀延及旌
德而公首奮忠勇剋復之百里之命於茲有寄是以兼

資文武而才足以有為者也今年夏政成上考余學徒馬某職教于縣承公勉勵作興之力於其行也求余文以贈馬生之言有信於是乎書使他日之史館傳循吏者有所採云至正十三年九月廿有四日

王學錄秋滿序

至正八年夏四月平江學錄王君達卿書滿去自教授而下洎郡之大夫士與君經游者咸詩賦歌以餞而屬予為首叙予方遊於蘇視蘇學之廢也甚矣提學者非

不薄責教也而教無以教鉤稽養也而養非所養郡膠
庠之大句覆不如一齊民之家塾有程有則也幸而官
於是事有憂焉憂而有為焉學之錄王君是也蓋王君
有孝有行人也曩之養非材者王君有以去之材失養
者王君有以引之養之非其數數之非其術者王君又
有以糾而正之他人日從其失王君日修其勤故蘇學
之廢而稍正伊王君是賴於是士之議者曰學校不得
良校官得一錄足以興教猶之郡不得良二千石得一

錄亦足以興治也以王君之克官于錄若是則積階為
郡幕官不能佐治于二千石者吾弗信已雖然以王君
之學愈修行愈力志愈遠大也又豈藉一文學之掾積
為資級而起哉君應進士舉余嘗視君大易之義矣深
微而潔淨又嘗視其賦也麗而則其代言也溫順而簡
古連不幸未售主司則主司之未明也一遇明主司君
之未售者售矣售則道山壁水其選也尚暇為人司二
千石吏牘之勞哉嘻抑之久者伸必遠懷之大者發必

洪吾言有俟於君矣

送徐州路總管雷侯序

至正八年夏天子以徐州之域風氣悍勁因以飢饉多
寇盜民困於昏墊八年春遂統有四州七縣之境為會
府一時僚吏艱厥選守長為尤艱於是海道都漕府萬
戶雷公某以首選為總管陞見其人申之以丁寧訓戒
而後往嗚呼以徐州為中原初府雷公為其開府守將
非其人之才賢負宿望一時且簡在上心者曷當此哉

余聞雷公之為棣州也棣寇盜之衝歷能守若干人無以為禦公不特善禦且有以化遣之至今棣人稱雷防禦嘖不去口其帥於海漕也前漕而去者多直魚龍之淵剽盜之策數人銷解舶公起漕凡一百八十萬不十日舟湊直沽道鯨濤如坦途粟無升合遺若公者可稱朝廷幹臣無負上選任者矣吁以棣州之化道海之庸推而大之於徐州也其有不稱重選答上訓旨者乎雖然吾方有感於地氣之王褒者吳楚為古荒要蔡放之

所逮今為衣冠玉帛之鄉徐豫為中土而鞠為山莽者
十六七一邑生齒有弗敵江以南一旅之聚民望南而
流如水之欲東司牧者弗能禁也今二千石以地闢戶
羨為著令公為徐州也治最對著今吾見中土之富庶
與今吳楚地同又豈憂赤子弄兵者本末止哉公尚以
余言勉之徐州之人日夜望之是年九月之三日吳人
士咸賦歌詩以餞而會稽楊某為之序

送平江路推官馮君序

平江路推官許下馮君秩滿蘇父老留不可則相與述
為歌謠以送之求予言登載其所善以為之序予客蘇
未久不識其所善詢之父老則曰由東嘉經歷治最任
高等升任刑官于蘇蘇煩劇郡也獄訟繁興奸偽百方
出上游之署有行丞相府監漕官都水使司海道都司
或所為政不直則賣直者乃聲於上受謗責在須臾間
而况貳推者闕君獨任大府獄事其視犴獄常欲為陷
死者求生路惟恐失附于律成案具吏多受獄貨欺情

偽於君者在署審成案未嘗退參所疑於父老賓客故
月朔作鄉約於父老賓客使之過有以告君之于刑官
敬事類此予曰獄者天下之大命也推官又命死生決
也何可以不之敬乎孔子於言偃之宰首以得人為問
欲其資於人者施於首政也矧獄之不自用而審取諸
人以為明者乎明智如臯陶淑問如臯陶其獄之疑猶
有資於神羊之所決者馮君任推訊而能取諸人以裕
諸己忠信清明見諸歌謠不必資于神物以為聰則馮

君不賢於臯陶已乎夫臯陶舉而不仁者遠馮君舉而
在高位吾見其民之有賴其仁者矣故書至正八年冬
十月

送理問所知事馬公序

行中書省古之藩國方伯連率之寄也地大任重故其
法揆嚴體統峻宣布政條于百司庶府惟大綱是張是
主凡細之務不至於執政之堂乃署理問所于垣內若
法曹議府焉所以發奸伏伸抑枉平允治法也官其所

者非才且賢莫勝其任而幕府之負又議法之所起也
東平馬公某為浙江行省理問所幕府官剛毅有為善
持法才每詳刑決政上其議於相府六曹莫不韙之而
百司庶府仰之以為準由是知其官之才且賢又莫急
於幕府負之才且賢也予喑代之居高位享厚祿者率
多世勲中貴之曹奴隸其部屬牛羊其人民以好惡決
是非以喜怒行賞罰頤指奔走孰敢少拂其情為其部
屬而又執筆居幕府負獨能持議不屈與巍巍赫赫者

相抗而求歸于口是若馬公者予所謂才且賢者非歟
公之所以持平曹取重政府者決非聲音笑貌之所得
也蓋公自公卿子弟練習朝章起身憲府吏為大郡從
事遂以廉能擢相府掾由掾為今職其能明庶事決大
議者可知已秩滿上名春官明天子方急法則之臣以
理天下之幽枉必有以處之矣於其行也叙以為別

送馬彥遠旌德教諭序

百里之治有長長選于吏部而承命於天子百里之教

有師師選於學而承檄於丞相垣師若輕於長然長不
教民無以為治教民必使專出於師則師之道實甚重
於長也故師道尊者百里之長禮之為賓不敢以勢上
之吁主百里之教者其可自待之微乎錢唐馬生彥遠
由明經舉為師儒之官初去為晉陵縣教師人以彥遠
才德受貢於卿大夫宜達於天子以為通都大邑之吏
而低徊偃蹇為教師於十室之邑疑其自視有憊憊然
者又豈知縣教師之係有重於縣長者乎吾聞旌德山

水邑也地不肥沃而多出秀民昔之擢高科為大儒者
往往有焉今歷歲大比者凡十數而士未有占貢籍者
豈人材之異於昔哉亦職教者亡狀之過也彥遠居家
孝於親與朋友交信義自立而講藝於晉陵者皆聖賢
之遺旨當世之要務也今去為旌德師以其修於家者
興其人之孝悌忠信以其講於道者作其人之經濟才
畧吾見旌德之士以行藝歌鹿鳴而來者皆推言其自
於教師則彥遠之道行有以佐一邑之治矣有何計百

里之吏窮卑彼此哉况彥遠道益大聞益彰其躡峻資
取高位與通都大邑之吏相頡頏特跬步地耳十室之
邑果足以久稽彥遠乎長旌德者亦憐公楊寶公皆右
文以為治也必以余言為然

送孔漢臣之邵武經歷序

國法慎守令之職號曰選用幕而元僚亦不委之鈐曹
常格以其司守令出內之喉舌也今天子既申明守令
之制而尤重幕元僚之選選必以廉靖有風才者居之

雖閩蜀二廣去天萬里遠三歲必遣使者抵其方面用
天子命以署置其官慎選守令與其幕元僚同一中書
吏部之嚴也奔競者往往爭入其選以利轉階之速而
不知司選者其如此才而賢者陞而不才不賢者其黜
多矣襄國公孔君漢臣始由胄監伴讀出從事徽州丞
相府聞其賢也辟為屬掾年勞滿而司閩選者有署為
經歷邵武蓋孔君之廉足以寡欲知足以矜微剛而易
以閤故以武名然小人勇於惡君子亦勇於為善也君

先聖之五十四代孫也。胄監之秀也。丞相府之素推擇也。推其善以及君子而化覃於小人。吾見邵武咸以道義相高而人人有鄒魯之風。不必擊斷鷙猛以成二千石之理者。非君而孰與於此乎。君往哉。毋徒謂入官遠。徼利而轉階之速云爾。其行也。取道吳淞之士咸為歌詩以餞。而余適會於其鄉人張彥明所。且介彥明徵余序。故序之。卷首云。至正九年四月四日。

送江淞都府吏倪光大如京師序

自成周選士之法廢士有逸而他出焉者吏道滯於儒者目吏為俗流於吏者目儒為迂二者始相兵而不相謀矣漢唐士有起自書佐卒吏至名宰相如蕭曹輩者固不可望十一於千百且以今吏言之例限七品秩復開以四品而不次登顯榮者往往列八位而不勘也若者起恪守陳編刻畫章句執一自用不達時宜其於修身齊家治國平天下之道非講之不詳一旦在官顛倒悖亂全與道戾故由科第取官者其政績不能不愈於

吏積起身者則亦有愧于古之士矣然吾亦有感於今之吏者揣摩徂伺深詆巧文力制長牧氣壓豪氓稱為能吏苟媮刻薄恃以為治具而欲望其國理民安是亦却行而求前矣虎林倪君光大蚤年讀經史欲由儒進志伸弗遂試吏於江浙都府周行推之為儒吏柳子厚曰士之習吏恒病于少文故給而少文不肆飾於華者又病於無斷故放而不制倪君以術師吏治吾知其給而能肆放而能制者也況其事七十之親以孝聞友朋

友以信自任夫孝與信忠君愛民之所出也君推之於吏治以日涉穹位食厚祿上列八位以任國家之大事非君誰望哉又豈得與州邑俗吏循資格為進級者同日語哉今赴京師上計錢糧事來別予吳門而吳之士君子又為詩以壯其行且推予為序遂引於卷首若此時見予望光大者遠云至正八年十月甲子序



東維子集卷四

欽定四庫全書

集部

東維子集卷五

六

詳校官中書臣孫衡

中書臣劉源溥覆勘

總校官進士臣繆琪

校對官編修臣莊通敏

謄錄監生臣王宜

欽定四庫全書

東維子集卷五

序

送劉主事如京師序

聖朝設官莫嚴於守令莫要於風紀風紀上明天憲守令下逮民情然居風紀往往由守令之得其職者以喻下情而後可以申上憲也番官於守令風紀者不己重

元 楊維禎 撰

乎大梁劉公文大初用茂才掾廣憲以識大體稱同知
於姚州事大得民譽力行覈由事富者惟見貧者力紓
建窮摘伏政號神明轉上海尹剔弊蠹振廢墜察譁民
之撓于政者積訟盡疏獄市遂理杜浦民有殺越人于
貨公至亟改過自新胥吏濫而詐者遣歸讀書公暇建
社學行鄉約禮凡民間簿書期會揭信于牆屋聽民自
詣胥隸意公三年不出郊關民扶老將幼聽教誨行禮
讓刑錯不用由是大化秩未滿司舉者以公廉能遷主

事戶部民泣而留不得行未幾丁內艱執喪如禮躬廬
幹山之墓民趨役者如子然始公尹邑之日咸謂公登
風紀臺省薦剡且交上矣而遣主戶部事與典邑諭民
情者不殊科皆御史之階也制閔覲京師吾知其不留
部矣職風憲者方與循守令交調公其不副邑民之望
乎果爾公去州郡承宣之勞而將受明天子耳目之寄
以東南民間利病不能徹當守者公悉究知其情矣某
事利某事弊某法因某法革使民無所疾苦而明天子

無赤子之憂非吾之人所期望公之所不自讓者乎邑人士歌詩以送者皆德於公而不能自己者辱與公交最善知最悉焉故序其所歌詩而又著民之期望於公者如是至正九年秋八月七日

送省理問所提控范致道序

論吏者曰吏廉無才不若亡廉而才嘻才吏之推重於世者如是矧又才而廉者乎論者之推從可知也山東范君致道由簿出佐至提控理問所案牘蓋今之所謂

廉而才者乎君在幕所在者府訊鞠事下持三尺論裁
諸曹林立咸心儀君聽闕決然後抱成案上署所所官
意三二君攘決辨是否歸諸一至其確於辨也上政事
堂與宰相而下爭枉直故難決事必經君即不經君必
後有失君既以廉律身廉則公公則明而又有才以制
之其應事也如鏡見微惡議法也如度度短長權定輕
重毫杪不少忒嘻制謂理所為行中書法部得廉而才
如范君者為賓佐非理所官之幸廟堂法部之幸也參

府莊嘉王公嘗竒其才彼命南征特辟君幕府君即勇
往參贊戎機雄畧君交盡其才而廉者之所推無往而
不理年勞滿理所官咸嘆息不忍其去吾謂理所官為
一所以惜以君之廉為天下信以君之才為天下服范君
當為天下用在古王制辨論官才而告於上者司馬職
也今之居是職者方復王制范君之名在辨論列則范
君自此將為天下大吏矣極吾民於塗炭還太平於聖
王非范君吾誰望范君尚以吾言力論

送杭州路推官陳侯執中序

余嘗讀史竊嘆于定國之治獄無冤則福流子孫而燕
士呼天六月飛霜東海殺孝婦三年大旱其變係于國
者如是代人法吏興一獄至蔓延數百人積歲不能決
卒陷之死地其傷天地之和者有矣我朝奄四海為家
深慮一夫有不平者內有刑部外有刑所郡又置推官
專刑獄之事蓋以變之所係者大故慎之也余來錢唐見
杭之推官陳侯執中者有定國之風焉杭之為郡地大

民多最號繁剝刑之頗辟獄之放紛有不可勝言者侯
居杭三年人仰之若父母畏之若神明咸頌之曰陳侯
未來政苛獄繁陳侯既來反薄而敦民蹶于阱陳侯生
之羊狼貪狠陳侯懲之吁嗟陳侯執法不煩風霆霜露
生意流行余聞而嘉陳侯以士君子待杭之人遂有士
君子行且不忘陳侯之德而歌舞之乃至正十一年九
月侯去杭覲京師士大夫謁余西湖之西出所集詩若
千篇推余序之故得論其事畧抑余聞陳氏之先有曰

寔者嘗為太邱長以德重於世而澤流子孫陳侯豈其
後耶今陳侯治獄無冤又若此則省府上之臺憲察之
必將大顯于天朝而福之流於子孫固未可一二數也
惟陳侯其勉之

送李景昭掾吏考滿詩序

濟寧李君景昭為江浙行中書省掾也以才器受知于
丞相府凡若干名稱赫甚考滿還里大夫士咸作歌詩
以道其意戀慕之私詩成一卷俾予序首予為之言曰

夫世之所謂善于世其家者豈徒傳珪襲組之謂哉其家法之所以貽於後者必將繼志承訓圖以趾前人之美而不隕其家聲焉爾惟君之先大夫文昌公以文學政事為時名卿其家則官規夫人之所取法而況於其子孫乎蓋吾於是而知君之善於承繼也始君游成均即有雋名繼用公廕授鄴州鄆城縣丞既為推擇為掾君以廉律已公以蒞事特文墨議論參贊碩畫奉上接下罔有弗周非所謂能趾前人之美而不隕其家聲者

乎昔者季孫行父之言以謂先大夫臧文仲教行父事君之禮行父奉以周旋弗敢失墜其後行父九十為魯名卿由是言之世之所謂善於其家者必若行父而後可若君者豈非行父其人歟夫善於世其家者忠孝之道也道人之善而不能無言者詩人情性之厚也序詩人之意而必本其父兄者厚之至也時之知君者尚以予言為不佞哉

送沙可學序

我國家混一天下地大民衆既內立中書以總其綱外復設行省十以分其治而方面之重土貢之多江浙寔居最省故釐其地者其人為難耳某年某官來總行省事求從事掾之賢能者首得一人焉曰沙可學氏又得一人焉曰高則誠氏又得一人焉曰葛元哲氏三人者用而浙稱治蓋三人者天府登其鄉書大廷崇其高等而拜進士出身賜任州理佐理之職者也宜具於簿書之繁劇筆牘之纖細有不屑焉而三人者屑焉何也或

曰掾年勞視州若縣加半三人者蓋利也夫天子之所
委重者惟一二大臣簡在上心者為股肱於內外內相
為天子得人為朝廷外相為天子得人為四方欲內外
無治不可也矧江浙之方面重而上貢多從事之掾不
擇其人之賢能有治才足以贊畫諾辨是非可否明治
理得失成敗而推習文法利刀筆者是取則何與為治
哉治不治較諸一州一邑其大小輕重何如耶今某官
之求賢能掾於三人者始能羅而致之以禮三人者又

能終不負其所求而相與以有成也則三人者豈果利於年勞而私便其身圖者耶可學秩且滿大臣留之不將薦之中朝其於行書吾言以為贈蓋士以外相得人為天子賀而不已有用之學為進士出身者勉

送嘉興學吏徐德明考滿序

聖朝三歲一大比興其賢者能者布列中外蓋欲收儒效於天下而致隆平之治也猶慮所選者有遺才州郡庠序司之吏復用文學生使以儒釋吏事其望儒之效

切矣吏出於儒者學升於州升於郡等而上之或憲漕
吏或理曹帥閫吏又等而上之則入流鈴於吏部簿部
縣寮知幕府坐祿位而治人矣殆非刀筆吏胥起巡尉
所者可同日較崇卑也朱方徐德明氏世業儒其祖父
皆以孝弟忠信為家風朝廷以孝義旌其門德明之才
器涵育薰陶有自來矣至正八年侍父遊嘉禾肄業郡
庠學正應公學焉為學司吏德明之司櫝於學也凡春
秋二丁朔望祭奠師儒之文告生徒之膳養金粟之勾

計營繕之書庸彈智竭慮一以奉公為心曩太守凌公
留意學校政季試以作人才習大樂以奉祭祀德明奉
承厥役靡倦于勤有成績至正三年教授康公來領學
事藉其協贊者居多越明年府檄本學官吏自徵祖入
德明奉行惟謹推之以誠約之以信佃夫輸逋莫不悅
服其有積曰門丁佃甲相根株為乾沒者德明又能廉
得之不煩垂楚而徵復元額觀德明之才敏學優有功
於學校者如此推此以往何試而不可乎年而既滿浩

然有去志士友挽留不可相與崇酒于觴載肉于俎餞
之東關之外德明又枉舟過余次舍求一言為行贐夫
千尋之木必自毫末而生萬里之途必由跬步而始繼
自今將見德明仕進之階日高而日遠曰漕曰憲曰理
曰節入流鈐於省部吾所謂坐祿位而治人者可指日
俟德明以予言勉之至正十三年秋七月日序

送理問所掾吏王安正考滿序

至正之三年江浙行省理問所掾吏東平王安正考滿

杭士友咸餞以詩詩成卷屬于會稽楊維禎為之序予
惟仕之由吏進者積年勞於簿書循資格於流品者常
才之所能而能人之不能者必英才俊特者也吾見其
人者安正王君者也淮賊猖獗一時繫仕版者非質懦
而懼識鄙而逃則詭軍功以資捷進者爾孰有憂國如
家委身殉職不以利鈍得失為却顧者哉邇者平章教
化榮祿公統兵西討屬掾在選中者安正為首列安正
起身理所議事用法人稱允及在軍中獻納謀畫卒能

參贊成功凱還計賞當擢高要而安正退就前考不敢
自有其功以取一階半級之榮亦可以知安正之克守
其正與一時繫仕版詭軍平功以資捷進者不侔矣方
今國家急才於有為有守之人安正雖不以軍勞資進
取而為國求才者吾知其不安正捨矣惟安正戒嚴以
俟至正十三年秋九月十日序

送浙江西憲書吏李公錫序

朝廷設官分職百司庶府要而重者無越于風紀天子

之耳目寄焉生民之血脉貫與臺內外以總其綱庶訪
十二道以張其目官於是者必思慎簡廼僚而書佐之
吏例以通大法敦風操者在選列也而士之欲出身自
見於世者不幸不為卿大夫所薦則亦於是顧觀其所
為主焉燕城李公錫之為浙右憲書吏也由憲府某官
知其操行文藝之異而推擇之公錫於某官觀其所為
主乃褒然而來如魚水之相得宮徵之相宣其為人廉
介耿峭才高而識遠司憲之長洎幕府之寮無不以其

言議為可否而公錫之執策獻替者未嘗不出於三尺
之公嘗侍某官調兵某所而贊畫之長弭戢之功彰彰
顯著今年秋年勞已滿瀕行吾屬餞言以為別先是公
錫由成均造士筮仕善祐庫使遂歷刑部吏部水庸田
照磨今以職官為憲府史是其老成才識諳時宜達政
體有以贊畫評佐中書之政者可日月與也嘻此海內
之人所周望豈直吾屬之望而已哉於其行也序以為
引至正十三年冬十月吉序

送李仲常之江陰知事序

江陰古延陵邑也在唐為州宋為縣復為軍今地利日廣民齒日繁處以散州直隸省部與他列州屬會府者實殊故居幕府者皆受天子命與會府之賓寮等也其地左姑蘇右京口前控大江後帶滄海鵠鼻為神禹之區席帽為郭璞之宅翠君中立石鳳旁飛此又其流峙之勝也故鄉有魚稻之富市有珠犀之珍人秀而文有淮楚之風其官府事簡自宋以來稱道院間兩浙宦遊

於其地不亦優且樂哉然近者盜作魚龍之數撓及漕賦文股椎結且以江國之衣冠者相貨居官是邑者不無優焉東易李君仲常去為其州知事仲常博識而敏於才好謀善斷掾內府十餘年以通了稱其應外務固恢乎其有餘裕矣仲常往哉佐其長以善道率其下以先勞吾見江陰之治有江山風月之勝魚稻珠犀之富而無魚龍之數之警以病吾政也不在仲常乎贊畫之暇形為咏歌幸有以寄我

送彭彥溫直學滿代序

學者司計主金穀出內之吝猶有司之有庾氏也庾得其司則民無窶斂官無悖出之患計得其司則農無失征士無失養然則校有官主教而計主養也養足而後教可以行則計之有功於學校又豈可以有司出內之吝賤其人乎故著令必慎選其人年勞滿者為諭錄起階近更令雖以府邑主檟吏易諭錄而負才譎者得以一介之士上佐二千石出政令其功德之及民者順且

易也視諭錄五年十年不得升次以行其志即得佐府
邑去老死不遠者孰優孰劣乎會稽彭彥溫氏家世儒
者也鄉大夫嘗以經行舉之有司弗售猶不遠數百里
從師于吳下由是吳學辟為學之司計其職乎計也
能稽籍以為入量入以為出樽節其橫費而金穀之用
恒有餘是其力于計而有功於學校者也年勞以滿教
之官及學士大夫咸惜其去而恐繼者之未得如彥溫
氏也然彥溫階此以司政績於府邑以佐二千石之行

事將見及人之力有大於學校者學士大夫又何惜乎其去也咸送以詩而屬予為序彥溫為予鄉閭生其仲彥明又從予遊故序

補過齋序

松江守陳府公初蒞政屬吏皆移病于外首鼠進退公曰吳兒欲以習詐為俗耶下令召見諸曹吏書佐視其可用者若干人中得蕭蘭獨稱悃悃似不能言者而中則慧了識事體府公前每白事必兼數曹無一

誤失者諸曹疏誕者學之而弗能萬一府公益獨奇之
蘭愈恪謹退公輒閉置斗室翻閱往史及今令甲書又
自命其齋曰補過取諸聖經之訓進盡忠退補過也介
其外舅閭翁求一言於子楊子楊子喜滋之民上有良
二千石下有悃悃吏一郡之慶也為之叙曰昔李孝伯
不就郡功曹曰委質事人亦何容易懼以職小咎大為
身辱耳子今有又何有於補云然古之大吏亦有閉閣
思過者知矧郡功曹在擬議三尺書之末者乎於是乎

叙而繫之銘辭過而不聞竇懼尼父過而能補人為舜
禹惟蕭史氏匪利刀筆補過盡忠允中功曹闕以悃悞
之質加以周密之理以行乎賢府公之成規過且無

鄉闈紀錄序

軍興貢舉事中廢士皆以弧矢易鉛槧之習至正十八
年冬中書下議驛梗外省士人會試必道海道海必候
風信於夏許先期春貢於是江淞行省以至正十九年
夏四月羣試吳越之士斤斤百餘人議者謂戎馬生郊

何暇閉門角文墨伎時左轄崔公專提調僉憲鄭公又
監督之而大相開府達公力主於上平章光祿張公特
助金谷之資假羣堂為貢院所不一月竣事選中左右
兩榜凡三十有六人備榜十有五人郡守謝節既以鹿
鳴典故宴士又梓行選中程文及簾內外官唱和詩亦
聯附於篇首編成徵余叙余既預考文事不得辭夫文
事得於盛明之時常不足紀而得於喪亂多故之秋則
非常也合叙以視後遂書是歲五月朔日

送甘肅省參政王公序

自昔內外臣重輕勞逸之體各有差故調有左右之辨
國家幅員之廣漢唐宋所未有也篤近舉遠衆建行省
省各置首貳平章丞參是也雖遠方面如雲南甘肅而
內中書臣交相出入不以輕重勞逸為辨與況天下在
太平全盛之日則凡內臣之出參遠方面者豈果為左
乎大梁王公可舉以文墨舊臣出參甘肅省政事吾黨
之士謂公宜居中論事陳王道上前致其主於三代之

隆也而出治於邊遠在萬里外豈不可惜哉是未識國
家衆建省理及吾聖人篤近舉遠之意也甘肅古西戎
地自受國家節制為冠帶之區數十年來興材取士其
風一變與諸夏等然則寄一邊之重而廣之以聲教之
盛非老成文臣不能宜公受命跋涉萬里外雖不在天
子之側不吝也是行也公其可自左哉公之行也自吳
之海漕吳人有賦詩以餞者使余為之叙故為公道其
職之重而且解左調之疑公者也至正七年冬十月初

吉序

東維子集卷五

欽定四庫全書

東維子集卷六

元 楊維禎 撰

序

鹿皮子文集序

言有高而弗當義有與而弗通若是者後世有傳焉無有也又況言麗而弗律義淫而無軌者乎自孔氏後立言傳世者不知幾人焉其滅沒不傳卒與齊民共腐者

亦不知幾人焉姑以唐人言之盧殷之文凡千餘篇李
礎之詩凡八百篇樊紹述著樊子書六十卷襍詩文凡
九百餘篇今皆安在哉非其文不傳也言厯義淫非傳
世之器也自今觀之孔孟而下人樂傳其文者屈原荀
況董仲舒司馬遷又其次王通韓愈歐陽脩周敦頤蘇
洵父子逮乎我朝姚公燧虞公集吳公澄李公孝光凡
此十數君子其言皆高而當其義皆奧而通也虞李之
次復有鹿皮子者焉著書凡二百餘卷子始讀其詩曰

李長吉之流也又讀其賦曰劉禹錫之流也至讀其所著書而後知其可繼李虞以達乎歐韓王董以羽儀乎孔孟子蓋公生於盛時不習訓詁文而抱道大山長谷之間其精神堅完足以立事其志慮純一足以窮物其攷覽博大足以通乎典故而其超然所得者又足以達乎鬼神天地之宜其文之所就可必行於人為傳世之器無疑也予怪言厖而義淫者往往家自摹刻以傳布于世富者怙資以為而貴者又怙勢以為意將與十一

經歷代諸子史並行而無敝不知屈氏而次彼雖欲不傳不得也必藉貴富以傳則貴富滅而文亦滅矣嗚呼貴富者不足怙以傳而後知文字之果足以傳世也文如鹿皮子而不傳吾不信也予以鹿皮子同鄉制之東而未獲識其人其子季持文集來且將其命曰序吾文者必會稽楊維禎也於是乎序鹿皮子陳氏名樵字君采金華人居圓谷礪常衣鹿皮自號鹿皮子云

留養愚文集序

括之士以時文名於今日者有林君則氏葉見山氏徐
景熹氏劉伯溫氏項子華氏以古學名者則有鄭息堂
公洪樂開公葉壺谷公留萬石公時文古學使通能之
則有不工者矣留君睿養愚乃萬石公之從孫也過余
姑蘇所次出鉅冊一編視曰此睿之雜著也先生號知
文幸為睿評而賜之序首焉予始讀其傳誌各一首客
來輟之夜張燈繼續讀之箴銘詩賦樂詞些語凡若干首
皆聲毗法合各適其職明日又讀其時文所攻尚書義

若干通又辭敷義斂不謬夫古史氏傳心之旨為之大
異曰古學與時文不通能而何留君之通能乎予聞括
為山州而留君所居山水為尤勝山有曰龍曰鶴曰文
曰錦曰九樓溪有曰好溪石響石潭有曰神潭山川潤
氣出為雨雲清明之英為日月之華小秀於草木而大
秀於人留君其大秀者歟不然括士之不薰長者留君
不克薰也雖然學古而後文古也文之諧於古者必不
諧於今韓子論時之文曰予大慚者人以為大好留君

有志於今文為進取計則不可以不慚者為之矣以慚者為之則於古者不能不悖矣留君將何以處此留君曰睿寧以古不慚者病於今毋寧以不大慚於今者病於古也遂書為序

聚桂文集序

秦漢之士無時文以其所陳說於上者皆近乎古而未
有立體製定格律以為去取如唐宋以來號為舉業者
也韓愈氏病之以為大慚者大好則時文不可以傳世

也諗矣我朝設科取士雖沿唐宋而其制則成周文則追古于唐宋之上故科文往往有可傳者然有司大比之所選者又不若師儒義試之所為取為優也何者大比之所選僅一日之長而義試之所取則寬以歲月之所得也大比開而作者或有遺珠之憾則主司之負諸生也義試開之作者或無擅場之手則諸生之負主司也嘉禾濮君樂開為聚桂文會於家塾東南之士以文卷赴其會者凡五百餘人所取三十人自魁名吳毅而

下其文皆足以壽諸梓而傳於世也予與豫章李君一
初實主評裁而葛君藏之鮑君仲孚又相討議於其後
故登諸選列者物論公之士譽榮之即其今日之所選
者莫盛於江浙而江浙之盛饒信為稱首者鄉評里校
之會歲不乏絕也今饒信之盛移於嘉禾嘉禾之賢守
長實為集賢凌公顥務古文而崇化文士有名世者作
不惟斯文增重而嘉禾之文風義俗從而振焉則文會
之作固有補於司政者不少也斯文鋟梓濮君又求一

言以叙首於是乎書

曹士弘文集後序

余生晚不及識廬陵曹先生及來錢唐獲覩與劉志善書書言劉光伯杜子美諸人之學不聞道王氏陸氏之學為無用之空談獨有志於述禮樂徵文獻余已異其為人恨不得與之共世同里間接其言議也未幾其子希顏以南陵遺藁來則知先生抱有用之才不見於世而見者惟此耳吁編簡零脫曾無幾矣詩凡若干篇文

僅二十有九首皆津津焉善言世故綜之以往史而宿
之以聖賢之理非代之學者謬悠無邊畔蕪澁險怪以
為辭者之所可及也觀其翁彥揚之讓議則范史不無
佚鴻闕之悖李庚伯之孝紀則鄆人對亦不無忍薄
之愧議之近於情而依理雖古之人懼焉況今之謬悠
為學而蕪怪為文者邪先生之學之才如此而世不材
其人利其道豈不媿當代君子乎予求生其人於今之
所接者不能為愧蓋益甚矣孟子以誦其詩讀其書不

知其人可乎是尚論其世也謹為之編次及正其脫訛而且志其尾以寄余尚友之心云

王希賜文集序

干將之器利可剗鍾然其利之司於人者有當不當焉君子以禦寇利也盜持以殺人亦利也文章大利器也而妄庸者輕用之世無時分寸利而危至於殺人吁可不慎諸故司文者不以輕屬妄庸憂憂乎難其人者誠以利器之雄偉不常而有推陷廓清之功者也自今求

其人於六籍而下斤斤鄒一人楚一人燕一人西漢三

人唐二人

通愈

宋三人

周程在焉

今姚

牧庵

虞

邵庵

而次未以數斷

句

之數人之文實代之利器而利之當於人者也皆雄

偉不常而有推陷廓清之功者也今之妄庸者蔓衍草

積動自哆大曰吾文鄒楚而降之文也當有傳也布於

今與後不必越五年十年其蔓衍草積者已與糞土同

腐傳何有乎括蒼王廉氏為文凡若干篇遭兵火而失

者過半今拾遺藁及續為文又若干弓王子讀書二十

年而始敢為文蓋有利器之本其為人礪硲有奇節又有利器之操者也知其利器不無用於世不無用於世則其傳於人與妄庸者異也必矣書以序之

再序

我朝文章肇變為劉楊再變為姚元三變為虞歐揭宋而後文為全盛以氣運言則全盛之時也盛極則亦衰之始自天歷來文章漸趨委靡不失於蒐獵破碎則淪於剽盜滅裂能卓然自信不流於俗者幾希矣吾嘗以

近代律今之文僅得與曾鞏蘇轍王安石李清臣陳無
已之流相追逐相亡而中衰也已不得步武於陸游劉
克莊三洪矧葉適陳傳良戴溪乎不得步武於葉適戴
溪陳傳良矧晁張秦黃乎不得步武於晁張秦黃矧二
蘇歐陽乎時則舉子之伎興矣不惟代無作者而鑑識
衡定為之先者無其人也亦久矣吁吾於此求夫篤於
自信不為流俗所移者東浙之士僅四三人曰王廉氏
其一也其為文不諧於人人則以鑑識衡定者屬於吾

吾每為之起畏諗其追古作者則西京而上秦與燕也
楚之騷也春秋之國語也班固崔駰而下弗論也若是
者其時於一已之獨不以一代之氣運盛衰為高下者
也豈不偉歟吾使魏生鎮錄其追於古者而告諸學古
之友云

楊文舉文集序

文章非一人技也大而緣乎世運之隆污次而關乎家
德之醇疵當世運之隆文從而隆家德之醇文從而醇

士以文墨為能事幸而生乎昭運之代又幸而出乎明德之家若吾宗文舉者非其人也乎文舉通微先生之嗣也先生領臺檄主文淵閣時予實列同考聽先生言議凜然為起立知先生之學出道江張氏張氏之學出紫陽朱子故其為議論文章不一於正不出也二十年來先生之墓樹拱矣幸先生有後如文舉獲見予吳門次舍示所著碑銘叙誌箴頌論贊凡若干卷累日讀之喜其識職而各毗于律理訥而其言沛如也予自居吳

門閭公之名能文者無慮數十家類未有及文舉者則知文舉之得其本於家而又丁乎氣運之盛於國家者非庸衆人之所同也昭昭矣抑吾臨文有感也先生入翰苑不兩月輒謝病歸高文大冊不一二見諸史院而文舉之文亦多遐方下邑之所撰錄未及鋪張乎帝畿也嘻文舉之文豈遽盡於是編也哉夫蘭臺芸館文章之居編摩述作文章之職也居其居而書夫言職者或有矣顧有得其職而不居其居者吾不信也文舉尚以

吾言侯之皇元一經業且作矣文舉尚以吾言勉之至
正戊子十二月序

春秋左氏傳類編序

三傳有功於聖經者首推左氏以其所載先經而始事
後經以終義聖人之經斷也左氏之傳案也欲觀經之
所斷必求傳之所紀事之本末而後是非褒貶白也然
考經者欲於寸晷之際會其事之本末不無繙閱之厭
於是類編者欲出焉鉅鹿魏生德剛初授春秋經學於

應君之邵應君始又執經於吾吾於三傳有所考索必
生焉是資其暇日以左氏所記本末不相穿貫者每一
事各為始終其類編之名曰春秋左氏傳類編昔鐸椒
虞卿輩各作左氏鈔撮其書蓋約言之編耳未知求經
統要也生之是編豈鈔撮可以較小大哉予念其用工
之勤俾繕寫成帙傳於同門之士生且求言以為序予
於春秋諸家有定是之錄凡十有二卷未敢傳於世也
蓋經有不待傳而明者因傳而蔽者學者通其明祛其

蔽而後聖人之經如日月之杲杲焉故不協者雖三家
大儒言之亦黜也生尚以予言有以定是於傳家則經
之如日月者不患不明矣生勉之哉是為序至正十四
年秋七月朔序

曹元博左氏本末序

左丘明受經於仲尼故作春秋傳以為聖經之按後之
傳左氏者有鐸椒嘗作鈔撮八卷虞卿作鈔撮九卷是
又有功於左氏者也惜其文無傳矣至漢張蒼賈誼復

傳左氏河間王進於武帝至成帝時劉歆校秘書而好之始立左氏春秋和帝時遂立其學而左傳大著又其後晉杜預復表章之而傳有注釋夫左氏為聖門弟子又身為國史纂記本末考索惟精其文或先經以始事或後經以終義大抵有以原始而要終也後之言經者舍左氏無以為之統緒故止齋陳氏謂著其所不書以見經之所書者皆左氏之功此章指之所由也雲間曹元博氏復按經以證傳索傳以合經為左氏叙事本末

若干弓類之精訂之審以博學者之觀覽其用心亦勤
矣論者以左氏作傳為仲尼忠臣杜征南作注為左氏
順臣非忠臣今元博序其本末抑為左氏順臣乎忠臣
乎蓋左氏之失工於言而拙於理好以成敗論人妖祥
計事往往傳過於註元博既序其本傳復能權衡其是
非合乎筆削之大義是又愛而知其惡謂為丘明之忠
臣也豈不偉哉元博尚以吾言勉諸

春秋百問序

六經皆有疑而莫疑於春秋疑而不決而欲得筆削之
微者蓋寡矣此春秋之經有百問也予家藏是書凡六
卷嘗授之無錫孟生季成季成又傳之於華亭曹君繼
善之子元朴朴以其傳之不廣也特鐫諸梓而徵予為
序是書也失其首辭久不知為何人所著或以為萬孝
先先又不知為何時人觀其設為問會者往往與予補
正之意合實有以釋是經筆削之疑予令孟生勿秘所
授而未及板行于世今曹君父子能推所秘於人不遂

吾之初心而賢於漢儒之私論衡於一己者乎雖然道學是講者謂說書不古慮學者不求諸心而惟口耳之是資夫百問之書探聖意之微而欲決之諸儒未決之論非見之卓思之精者能之乎謂資口耳之辨不可也學者於春秋苟讀而未有疑疑而未求釋于心而遽觀是書之廣傳也為病則固存乎其人焉

春秋定是錄序

柳子曰春秋如日月不可贊也然則高自立論者皆誕

也歐陽子曰春秋如日月然不為盲者明而有物蔽之者亦不得見然則將以制盲而祛蔽則亦不能不假於詞也經不待傳而明者十七八因傳而蔽者十五六明目者祛其蔽而通其明則其如日月者杲杲矣余怪三家既有蔽焉而諸子又於其蔽者析宗而植黨爭角是非不異訟牒使求經者必由傳而求傳者又必繇諸子是非紛紛莫適所從經之杲杲者晦矣世之君子既晦於求經復於諸子求異其說是添訟於紛爭之中惡物

蔽目而又自投以醫者也維禎自幼習春秋不敢建一新論以立名氏謹會諸儒之說而輒自去取之為定是錄說協於經雖科舉小生之義在所不遺其不協者雖三家大儒之言亦黜也吁予又何人敢以一人之見與奪千載之是非何僭自甚亦從其杲杲者決之焉耳後之君子倘以錄猶未是改而正諸豈敢諱乎

褚氏家譜序

褚氏之系出自微子宋共公子段食采於褚號曰褚師

因氏焉其在衛有褚師子申定子者蓋其族之仕於衛者也漢元成間有褚先生大以行顯嘗補司馬遷史記六朝以來褚陶褚裒皆以文學名至唐褚亮博學才敏預瀛洲學士之選其子遂良為顧命大臣遂良由河南徙錢唐其子孫所居號褚家塘後有徙居茗城者亦以褚姓其巷今聚族烏程之朱塢即自茗城來也其祖為世超墓在朱塢後浜冢舍曰光遠菴云世超生世隆生大理評事琳琳生省幹溶溶生宋闕

郎提幹大同大

同生宋迪功郎淮安縣丞士登士登之子長宣教郎友
龍次仲龍友龍無子以仲龍之子將仕郎國史實錄院
檢閱文字天祐為嗣焉天祐三子長錫珪善州教授次
錫琦次錫瑜蒙古學正善州四子嗣良嗣英嗣俊嗣賢
錫琦無子以嗣英為其後自士登以前凡十世皆以詩
書起家由科舉入仕者代不乏人宋革故居遭兵燹子
孫亡其實錄嘉言善行不復可考矣嗣英於族叔祖桂
岩公所訪得家譜令其子桂繕寫為冊冊成乞予序予

謂君子之澤五世褚氏已踰十世而其來者尚未艾也
桂之為伯仲者凡六人皆從碩師習舉子業里以衣冠
之族稱焉歲大比鄉大夫錄以充賦者褚氏子孫居多
吾卜褚氏祖之積者厚而嗣英之培其積者益至吾見
褚氏之來者益衍而大以五世之澤論君子者又豈可
以律於褚氏之澤哉褚氏子孫尚以予言勉之

送朱女士桂英演史序

錢唐為宋行都男女痛峭尚嫵媚號籠袖驕民當思陵

上太皇號孝宗奉太皇壽一時御前應制多女流也若
碁待詔為沈姑姑演史為張氏宋氏陳氏說經為陸妙
慧妙靜小說為史惠英隊戲為李瑞娘影戲為王潤卿
皆中一時慧黠之選也兩宮將幸聚景玉津內園各以
藝呈天顏喜動則賞賚無算此太平朝野極盛之際今
當此刀鳴鏑語時故家遺老或與退璫畸媿談先朝故
事未嘗不興感隕淚也至正丙午春二月予蕩舟娛春
過濯渡一姝淡粧素服貌嫵雅呼長年艤櫂歛衽而前

稱朱氏名桂英家在錢唐世為衣冠舊族善記稗官小說演史於三國五季因延致舟中為予說道君良獄及秦太師事座客傾耳聽知其腹笥有文史無烟

闕

予奇之曰使英遇思陵太平之朝如張宋陳陸史

闕

史於稠人廣衆中亦可以敦勵薄俗則吾徒號儒丈夫者為不如已古稱盧文進女為女學士予於桂英亦云

東維子集卷六

欽定四庫全書

集部

東維子集卷八

詳校官中書_臣孫衡

中書_臣劉源溥覆勘

總校官進士_臣繆琪

校對官編修_臣莊通敏

謄錄監生_臣王宜

欽定四庫全書

東維子集卷七

元 楊維禎 撰

序

吳復詩錄序

古風人之詩類出於閭夫鄙隸非盡公卿大夫士之作也而傳之後世有非今公卿大夫士之所可及則何也古者人人有士君子之行其學之成也尚已故其出言

如山出雲水出文草木之出華實也後之人執筆呻吟
模朱擬白以為詩尚為有詩也哉故摹擬愈偏而去古
愈遠吾觀後之樸儻為詩而為世道感也遠矣間嘗求
詩於摹擬之外而未見其何人富陽吳復見心持詩來
讀其古什凡若干首決非摹擬而成者知學有古風人
之旨矣吁使復達而有位為朝廷道盛德製雅頌復之
作不為古公卿大夫士之作乎吁又使人人如復不以
摹擬為詩古詩不復作者吾其無望於後乎復益勉之

以徵吾言焉可也

趙氏詩錄序

評詩之品無異人品也人有面目骨骼有情性神氣詩之醜好高下亦然風雅而降為騷騷降為十九首十九首而降為陶杜為二李其情性不桎神氣不羣故其骨骼不庳面目不鄙嘻此詩之品在後無尚也下是為齊梁為晚唐季宋其面目日鄙骨骼日庳其情性神氣可知已嘻學詩於晚唐季宋之後而欲上下陶杜二李以

薄乎騷雅亦落落乎其難哉然詩之情性神氣古今無間也得古之情性神氣則古之詩在也然而面目未識而謂得其骨骼妄矣骨骼未得而謂得其情性妄矣情性未得而謂得其神氣益妄矣吾友宋生無逸送其鄉人趙璋之詩來曰璋詩有志于古非錮於代之積習而弗變者也是敢晉于先生求一言自信余既訝宋言而覆其詩如桃源月蝕頗能力拔于晚唐季宋者它日進不止其於二李杜陶庶亦識其面目識其面目之久庶乎

情性神氣者併得之璋父勉乎哉母曰吾詩止於是而已也至正丁亥九月望在姑蘇錦秀坊寫

李仲虞詩序

刪後求詩者尚家數家數之大無止乎杜宗杜者要隨其人之資所得爾資之拙者又隨其師之所傳得之爾詩得於師固不若得於資之為優也詩者人之情性也人各有情性則人有各詩也得於師者其得為吾自家之詩哉天台李仲虞執詩為贅見予於姑蘇城南且云

學詩於鄉先生丁仲容氏明旦則復謁出詩一編求予
言以序予夜讀其詩知其法得於少陵矣如五言有云
湛露仙盤白朝陽虎殿紅詔起西河上旌隨斗柄東西
北干戈定東南杼軸空置諸少陵集中粹未能辨也蓋
仲虞純明篤茂博極文而多識當朝典故雖在布衣憂
君愛國之識時見於詠歌之次其資甚似杜者故其為
詩不似之者或寡矣吾求丁公之詩似杜者或未之過
則知仲虞之詩列乎家數者不得於其師而得於其資

也諗矣雖然觀杜者不唯見其律而有見其騷者焉不
唯見其騷而有見其雅者焉不唯見其騷與雅也而有
見其史者焉此杜詩之全也仲虞資近杜矣尚於其全
者求其備云至正戊子九月丙辰序

張北山和陶集序

詩得於言言得於志人各有志有言以為詩非迹人以
得之者也東坡和淵明詩非故假詩於淵明也其解有
合於淵明者故和其詩不知詩之為淵明為東坡也涪

翁曰淵明千載人東坡百世士出處固不同氣味乃相似蓋知東坡之詩可比淵明矣天台張北山著和陶集若干卷藏于家其孫師聖出其親手澤求余一言以傳世蓋北山宋人也宋革當天朝收用南士趨者瀾倒微書至北山北山獨閔關弗起自稱東海大布衣終其身喜正士之節其有似義熙處士者歟故其見諸和陶蓋必有合者觀其胸中不合乎淵明者寡矣步韻倚聲謂之迹人以得詩吾不信也雖然世之和陶者不止北山

也又豈人人北山哉吾嘗評陶謝愛山之樂同也而有不同者何也康樂伐山開道入數百人自始寧至臨海敝敝焉不得一日以休得一於山者猶矣五柳先生斷轅不出一朝於籬落間見之而悠然若莫逆也其得於山者神矣故五柳之詠南山可學也而於南山之得之神不可學也不可學則其得於山者亦康樂之役於山者而已耳吾於和陶而不陶者亦云至正八年夏五月六日

剡韶詩序

或問詩可學乎曰詩不可以學為也詩本情性有性此有情有情此有詩也上而言之雅詩情純風詩情雜下而言之屈詩情騷陶詩情靖李詩情逸杜詩情厚詩之狀未有不依情而出也雖然不可學詩之所出者不可以無學也聲和平中正必由於情情和平中正或矢於性則學問之功得矣或曰三百篇有出於匹夫匹婦之口而豈為盡知學乎曰匹婦無學也而遊於先王之澤

者學之至也發於言辭止於禮義與一時公卿大夫君子之言同錄於聖人也非無本也我元之詩虞為宗趙范楊馬陳揭副之繼者疊出而未止吾求之東南永嘉李孝光錢唐張天雨天台丁復項炯毗陵吳恭倪瓚蓋亦有本者也近復得永嘉張天英鄭東姑蘇陳謙郭翼而吳興得郟韶也韶詩清麗而溫重無窮愁險苦之態蓋其強力於學未止探其本之所出極其作之所詣蓋得騷之聲得雅之情則雅之聲矣又豈直在元詩一人

之數追逐李張丁項輩而止乎韶勉之而已其成帙者若干卷

兩淞作者序

曩余在京師時與同年黃子肅俞原明張志道論閩淞新詩子肅數閩詩人凡若干輩而深詆余兩淞無詩余憤曰言何誕也詩出情性豈閩有情性淞皆木石肺肝乎余後歸浙思雪子肅之言之冤聞一名能詩者未嘗不躬候其門採其精工往往未能深起人意閱十有餘

年僅僅得七家其一永嘉李孝光李和其一天台項炯
可立其一東陽陳樵君采其一元鎮其二老釋氏曰句
曲張伯雨雲門思斷江也昔王劉二子能重河朔矧七
家者不足以重兩浙乎惜不令予肅見之嘗論詩與文
一技而詩之工為尤難不專其業不造其家冀傳於世
妄也蓋仲容李和放乎六朝而歸準老杜可立有李騎
鯨之氣而君采得元和鬼仙之變元鎮軒輊二陳而造
乎晉漢斷江衣鉢乎老谷句曲風格夙宗大厯而痛矻

去纖艷不逞之習七人作備見諸體凡若干什目曰兩浙作者集非徒務厭子肅之言實以見大雅在浙方作而未已也若其作者繼起而未已也又豈僅僅七人而止哉

衛子剛詩錄序

余入淞見世家子弟凡十數人能去裘馬之習以文墨為事者蓋寡矣城西衛子剛蓋山齋別駕公之孫也首贅詩見余既而復出敬聚齋詩稿一編讀其古詩如秋

夜曲白苧詞其排律如九山讌集五言律如江水深深
碧梨花淡淡明九農勞畚耜三邵足風波七言律如亞
夫舊是將軍子賈誼初傳太傅官玉人嬌列錦步陣銀
筆醉調金縷衣醉吹銀笛五老洞閒拾瑤草三神山其
絕句如消寒圖一首音節興象皆造盛唐有餘地非詩
門之顯主者不能至也昔人論詩謂窮苦之詞易工驪
愉之詞難好子剛之工不得於窮苦而得於驪愉可以知
其才之高出等輩不得以休戚之情限也子剛之年未

踰壯而其詞之工已如此使復益之以春秋才愈老茂而詞愈高古又豈止今日所覩而已哉至正九年夏四月廿有九日序

玉山草堂雅集序

崑山顧仲瑛哀其所嘗與遊者往還唱和及襍賦之詩悉錄諸梓編帙既成求余一言以引諸首余來吳見吳之大家友於人者往往市道耳勢要耳聲色貨利耳不好聲利而好雜流者寡矣矧好儒流乎不好儒流而好

書數者寡矣矧好文墨章句為不朽之事乎仲瑛嗜好
既異於彼故其取友亦異其首內交於余也築亭曰其
亭以尊余之所學也設榻曰其榻以殊余之所止也余
何脩而得此哉蓋仲瑛之慕義好賢將以示始於余示
始於余而海內之士有賢於余者至矣故其取友日益
衆計文墨所聚日益多此草堂雅集之出於家而布於
外也集自余而次凡五十餘家詩凡七百餘首其工拙
淺深自有定品觀者有不待余之評裁也其或護短憑

愚持以多上人者仲瑛自家權度又輒能是非而去取之此次其有可觀者焉攬之者無論其人之貴賤穉宿及老釋之異門總其條貫若金石之相宣也鹽梅之相濟也蓋必有得於雅集者矣得於雅集則亦有得其為人者焉仲瑛讀書之室曰玉山草堂故集以之名其自著有玉山瑛藁玉山樂府行于時云至正九年夏五月十有二日

郭義仲詩集序

詩與聲文始而邪正本諸情皇世之辭無所述間見於
帝世而備於三百篇變於楚離騷漢樂歌再變於琴操
五七言大變於聲律馴至末唐季宋而其弊極矣君子
於詩可觀世變者類此古之詩人類有道故發諸詠歌
其聲和以平其思深以長不幸為放臣逐子出婦寡妻
之辭哀怨感傷而變風變雅作矣后之詩人一有嬰拂
或飢寒之迫疾病之楚一切無聊之窘則必大號疾呼
肆其情而後止間有不然則其人必有大過人者而世

變莫之能移者也予在錢唐閱詩人之作無慮數百家
有曰古騷辭者曰古樂府者曰古琴操者談何易易習
其句讀其果得為古風人之詩乎不也客有語予詩之
學則曰有三百篇楚離騷漢樂歌之辭生年過五十不
敢出一語作末唐季宋語懼其非詩也以此自効而又
以之訓人人且覆誅我則有未嘗不悲今世之無詩也
幸而合吾之論者斤斤四三人焉曰蜀郡虞公集永嘉
李公光東陽陳公樵其人也竊繼其緒餘者亦斤斤得

四三人焉曰天台頂烟姑胥陳謙永嘉鄭東崑山郭翼也翼蚤歲失怙中年失子家貧甚屢病宜其言之大號疾呼有不能自遏者而予每見其所作則皆悠然有思澹然有旨興寄高遠而意趣深長讀之使人脩然自得且爽然自失而於君親臣子之大義或時有發焉未嘗不嘆其天資有大過人者而不為世變之所移也予在婁江時翼持所作詩來謁序今年遊學於淞又挾其編來杭申前請於是乎書翼字義仲東郭生其自號也至

正十一年十二月廿有二日

雲間紀遊詩序

詩有為紀行而作者乎曰有北風其涼雨雪其雱惠而好我携手同行此民之行役遭罹亂世相攜而去之作也忝離曰彼忝離離彼稷之苗行邁靡靡中心搖搖此大夫行役過故都宮室彷徨而不忍去之作也後世大夫士行紀之什則亦昉乎是幸而出乎太平無事之時則為登山臨水尋奇拾勝之詩不幸而出於四方多事

豺虎縱橫之時則為傷今思古險阻艱難之作北風黍離代不乏已錢唐莫君景行自壯年弃仕泊然為林下人然好遊而工詩不已雲間有遊所歷名山巨川前賢之宮隱士之廬名勝軒亭之所一一紀之以詩蓋非北風黍離之時則非北風黍離之詩固依約時之治亂以為情之慘舒者也莫君此集好事者且傳為尋奇拾勝之作鋟梓以行莫君何幸也集凡若干首來謁予序予方被命為錢唐關令日有官勞無隙晷及文墨自况海

隅失太平者三四年方將有大夫行役之艱而不能如
景行之從容笑歌於山水之樂也因觀是集感慨係之
至正十四年秋八月十有四日書為序

金信詩集序

言工而弗當於理義窒而弗達於辭若是者後世有傳
焉無也又况言龐而弗律義淫而弗軌者乎自三百篇
後人傳之者凡幾何人屈賈蘇李司馬揚雄尚矣其次
為曹劉阮謝陶韋李杜之迭自名家大抵言出而精無

靡而弗律也義據而定無淫而弗軌也下此為唐人之律宋人樂章禪林提唱無鄉牛社下俚之謠詩之敝極矣金華金信氏從余遊於松陵澤中談經斷史於古歌詩尤工首誦余古樂府三百輒能游泳吾辭以深求古風人之六義又自賀曰吾入門峻矣大矣吾詩降而下吾不信也一日使為吾詩評曰或議鍊雅句律本屈柳天問某曰非也屬比之法實協乎春秋先生之詩春秋之詩歟詩之春秋歟余為之喜而曰信可與言詩已於

是絕筆於近體所為詩有春草軒所編如古琴操趙璧
詞荆卿篇博浪雖月支王頭飲器歌其氣充其情激其
詞驚以諧吁信之詩有法矣此豈一朝一夕之致耶其
素所畜積蓋至今二十有餘年矣今天子制禮作樂使
行天下采風謠入國史東州未有應之者吾將以信似
之

蕉園律選序

詩至律詩家之一厄也東坡嘗舉杜少陵句曰五更鼓

角聲悲壯三峽星河影動搖五夜漏聲催曉箭九重春色醉仙桃是後寂寥無聞吾亦有云露布朝馳玉關寨捷書夜報甘泉宮今嚴鍾鼓三更月野宿貔貅萬竈煙為近之耳余嘗竒其識而韙其論然猶以為未也余在淞凡詩家來請詩法無休日騷選外談律者十九余每就律舉崔顥黃鶴少陵夜歸等篇先作其氣而後論其格也崔杜之作雖律而有不為律縛者惜不與老坡叅講之上海蕉夢生釋安者集有元名能詩家自虞馬而

下律之唐者凡三百餘首帙成命曰蕉窗律選攜以索
余引梓行海內以警詔翫散忘滯之音選中多有雄渾
合坡舉似者第軼出崔杜上頭者未見一二編末過取
余放律斲硬排聳者凡十餘蓋安學詩於吾門亦有日
矣是宜所取雅合余所講者是集行則皇朝風雅之選
於賅者君子有所不遺

梧溪詩集序

世稱老杜為詩史以其所著備見時事予謂老杜非直

紀事史也有春秋之法也其旨直而婉其辭隱而見如東靈湫陳陶花門杜鵑東狩石壕花卿前後出塞等作是也故知杜詩者春秋之詩也豈徒史也哉雖然老杜豈有志於春秋者詩亡然後春秋作聖人值其時有不容已者杜亦然梧溪集者江陰王逢氏遭喪亂之所作也予讀其詩悼家難憫國難採撫貞操訪求死節網羅俗謠與民謳如帖木侯張武畧張孝子費夫人趙氏女丙申紀事月之初生天門行竹笠黃官柳場無家燕諸

篇皆為他日國史起本亦杜史之流歟逢本山澤之士其澹泊閒靖是其本狀而有春秋屬比之教故予亦云春秋之詩也採詩之官苟未廢也則梧溪之春秋得以私自託也不然何其屬比于冊者班班乎其無諱若是也訂其格裁則有風流俊采豪邁跌宕不讓貴介威武之夫者蕪人之長亦頗似杜吁代之勦故殘餘欲傳於世稱為作人而逢詩不傳吾不信也至正十九年冬十一月初吉序

齊藁序

詩之厚者不忘本也先民情性之正異乎今之詩人曰
某體六朝體杜夔州孟襄陽李西崑也安識所謂推本
其自者哉高唐盧昇氏三盧相家莊惠公之孫也十三
善為詩嘗從河東張先生遊南來又相從余於分唐杖
屨間集其所自為詩一編曰齊藁齊蓋其所出故以名
示不忘其本媵焉故鄉邈若隔世界尚能對余畫地為山
川及條其舊俗纖悉可終宜其詩之特也

關

原今觀其

詩多協古詩人比興風容色澤類揖遜乎先生之世卿
大夫周行也此豈令人妄一男子談漢魏六朝夔州襄
陽西崑者耶吾是以器而重之今聞虛櫟之寢退吾將
約畀循海而南跡師尚父所封之履登泰山日觀歷數
山河之舊河西善謳者吾無間將以尋小白君臣之霸
烈而泱泱之大風尚在述為制作當唱予而和汝

孫氏瑞蓮詩弓序

淞之東曰黃浦浦之東曰橫溪溪之上孫善之家焉家

有園池之勝至正七年五月朔日池上出瑞蓮一茄而
雙花遠近聞者爭覩曰蓮之層曰瑞菡萏雙而茄獨者
亦曰瑞既而善之會賓友燕池上皆舉酒為善之賀觴
餘各賦詩凡若干首哀而成弓因予友許君如心來乞
序余謂凡天地間物產之異若人不以為怪必以為瑞
然怪非自怪因人而怪瑞非自瑞亦因人而瑞人有怪
之微物雖瑞而瑞猶怪人有瑞之微物雖怪而怪猶瑞
芝中產于商顏之隱瑞也見于元封虛耗之君覆怪矣

嘉禾產于共和之時瑞也見于赤烏搶攘之年覆怪矣
吾聞善之累世家風孝友善之又凋儻有奇節慕義而
強仁瑞蓮之產非其邁種德之驗乎德有瑞驗花有瑞
符謂蓮非孫氏之瑞乎吾不信也善之益芸而學益種
而德天之生祥下瑞為孫氏顯章殆未艾也嘻蓮無一
茄而雙花間有則人稱以為瑞物人無累葉而不分間
有則人不以為瑞人乎唐史曰天瑞五色雲人瑞鄭人
表此瑞人說也善之勉焉尚有以膺此稱也夫

詩史宗要序

詩之教尚矣虞廷載賡君臣之道合五子有作兄弟之義章關雎首夫婦之匹小弁全父子之恩詩之教也遂散於鄉人采於國史而被諸歌樂所以養人心厚天倫移風易俗之具實在於是後世風變而騷騷變而選流雖云遠而原尚根於是也魏晉而下其教遂熄矣求詩者類求端序於聲病之末而本諸三綱達之五常者遂棄弗尋國史所資又何采焉及李唐之盛士以詩命世

者殆百數家尚有襲六代之敝者唯老杜氏慨然起攬
千載既墜之緒陳古諷今言詩者宗為一代詩史下洗
哇娼上薄風雅使海內靡然沒知有百篇之旨議論杜
氏之功者謂不在騷人之下噫比世末學咸知誦少陵
之詩矣而弗求其旨義之所從出則又徇末失本與六
代之弊同余為太息者有年龍江殷生謁余錢唐次舍
袖出手編目曰詩史宗要觀其編什首君臣終朋友一
根極於倫理表端分節顯要正訛或有宗趣炳然而日

星列沛然而江漢注挈焉而領張洞焉而鑰啓千百五
篇之大旨博而約之于一帙之中其忠君孝友之至情
鵲鳩鵲鷦之餘韻使習其讀者油然而有感哀得此弗
覺病懷灑然若能言吾之所欲者後學小子操是嘉量
以廣品諸作又何騷雅之弗近而聲詩之教不還於古
哉生重以序請遂書其卷首如此生名惟肖字起巖汝
南人嘗從游於余與海內名士李公孝光張公天雨段
公天祐為忘年詩友云至正十三年九月十日在分塘

之五柳園亭寫

曹氏雪齋弦歌集序

女子誦書屬文者史稱東漢曹大家氏近代易安淑真之流宣徽詞翰一詩一簡類有動於人然出於小聰狹慧拘於氣習之陋而未適乎情性之正比大家氏之才之行足以師表六宮一時文學而光父兄者不得並議矣予居錢唐聞女士有曹雪齋氏以才諳稱於人嘗持所著詩文若干篇介為其師者丘公其見自陳幼獲晉

于酸齋貫公恕齋班公而猶未及見先生也幸先生賜
一言以自勵今年予在吳興復偕乳母氏訪予洞庭太
湖之上為予歌詩鼓琴以寫山川荒落之悲引關雎朝
雉琴操以和白雪之章予默諗雪齋氏之善人倫風操
述作又其餘爾吁大家氏之後不為猶有人乎予聞詩
三百篇或出於婦人女子之作其詞皆可被於弦歌聖
筆錄而為經律諸後世老於文學者有所不及其得以
磴磴女人棄之乎若雪齋氏之述作也本之以天質者

而達之以學發之於咏而協之以聲律使生於三百篇之時有不為賢筆之所錄者乎故上下刪取其所作能追古詩人之風與其琴調善發貞人壯士之趣者為曹氏弦歌集他日太史氏或有採焉截其過而適之中約其偏而合之正則王道之事畢矣豈直大家氏之後猶為有人之慶哉至正五年十一月序

富春八景詩序

富春自嚴子陵耕釣後至今一草一木與客里俱高子

觀烏龍金華諸山如奔猊渴驥夾江而下與越之千巖
萬壑吳之龍飛鳳舞者會而同盡于海其中朝朝夕汐
一往一來耀人耳目者又天下之奇觀山川鍾秀間世
而起者孫仲謀之稱孤江左葉中書入相本朝他如名
臣韻士仙蹤梵蹟不可一二殫紀昔柳之愚溪僻在荒
服而見采柳子黃之赤壁鞠為戰場而見賦坡公遂皆
有以表見於世富春品題獨未表見於昔人豈造物者
之有待於後人乎至正乙未余游富春與其邑人馮正

卿及予韓魏二三子相與品題時八景先是吾里人張世昌有其六詠其詞未傳要之比興體製非徒求工於景物兼欲道其人物名節之盛必有待乎能言之士使後日如李翰林之嘆崔顥於黃鶴樓閣都督之奇王勃於洪都府則富春山水當與愚溪赤壁感柳蘇之遇者同一德色品題之寄其可苟也哉余唱詩八首二三子者和之而予序之如此

鐵雅先生拘律序

附

先生嘗謂律詩不古不作可也其在錢唐時為諸生講律體始作二十首多奇對其起興如杜少陵用事如李商隱江湖陋體為之一變然於律中又時作放體此乃得於類然天縱不知有四聲八病之拘其可駭愕如乖龍震虎排海突嶽萬物飛走辟易無地觀者當以神逸悟之不當以雄強險阨律之也句曲張伯雨嘗曰無老鍊力者便墮落盧馬後大蟲耳故今衰此拘體凡若干首先生見之且令某評之如何太極生頓首曰真色脫塗

抹天巧謝雕鏤太初生曰健有排山力工無剪水痕安
曰先生拘律自是水犀硬弩朱屠鉄槌人見之昂然有
不可犯之色然其中自有翕張妙法此先生拘律體也
先生擊几賞之以為二三子知言併錄為序釋安謹序

東維子集卷七